

Kitabu kya Ruusi Kwanjuura

Kiki kitabbu kibaza ha mukali gibakweta Ruusi wa mu nsi gya Mowaabbu. Haaloho mugumweji gwa b'Isaleeri gunyakubba gudemukiri mu nsi gya Mowaabbu habwa nzala ginyakubba gigwiri mwihanga ly'Isaleeri. Omweji mu basigazi ba mu gugwo mugumweji yaatungiri yogwo muhala, Ruusi, yaamuswera.

Beitu heinyuma bantu ba mu gugwo mugumweji benseji baakwiri kutoolaahona maa mugumweji gibeetengi Nahume na bamukaabaana. Nahabwakikyo Nahume yaacwirimwo yeemuka Bbeterehemu mu bantu baamwe cali baali barugiri. Beitu mukaamwana waamwe, Ruusi, yaacwirimwo kugyenda na mubyala gyamwe, yeikiriza kuramya Ruhanga w'Isaleeri.

Hali baadwereeri Bbeterehemu baali batali na kintu kyenseji. Beitu Ruhanga yaabategekeeri yaataho mudulu mugumweji kandi murungi gibeetengi Bbowaazi, munyakuswera Ruusi kandi yaawoneera na Nahume. Mu kuswerangana kwa Ruusi na Bbowaazi, Ruhanga yaabaheeri mwana wa budulu gibeetiri Obbeedi. Obbeedi yaali haaha Daudi, Daudi munyakubba mukama w'Isaleeri.

Bicweka bihandu mu kiki kitabbu nka kubihondereeni

Nahume niyeemuka na Ruusi mu Bbeterehemu *Ruusi 1:1-22*

Ruusi naaromba na Bbowaazi *Ruusi 2:1—3:18*
Bbowaazi naatwala Ruusi kubba mukali waamwe *Ruusi 4:1-22*

Erimereki na Mugi Gwamwe Nibali mu Mowaabbu

¹⁻² Mu biro bya kadei, hali balemi b'Isaleeri baali basali ba misangu, haagwirihho nzala gya maani hoji mu nsi gigyo gy'Isaleeri. Kandi haaloho mudulu gibeetengi Erimereki wa mu luganda lw'Efuraati, munyakwicalanga mu rubuga lwa Bbeterehemu mu Yuda. Yogwo mudulu yaarugiri mu gigyo nsi hamweji na mukali waamwe gibeetengi Nahume na batabani babiri babeetengi Mahalooni na Kiryonj, baagyenda kwicala mu nsi gya Mowaabbu.

³ Bubaali nibacaali mu nsi gya Mowaabbu, Erimereki yaakwa, Nahume yaasigala na batabani baamwe babiri.

⁴ Heinyuma babwo batabani ba Nahume baatungiri bakali bakuswera kuruga mu bantu ba Mowaabbu. Omweji hali babwo bakali baamwetengi Orupa na wondi Ruusi. Beitu heinyuma gya myaka nkeikumi,

⁵ na batabani ba Nahume nabo baakwa. Kukwa kwabu kwamutigiri yankei, atali neiba na batabani.

Nahume na Ruusi Nibeemuka mu Bbeterehemu

⁶ Beitu Nahume buyaali nacaali mu Mowaabbu, yeegwirihho makuru gakukoba MUKAMA nka kuyaaajuniri babwo bantu b'Isaleeri

yaabaha kwerya bidyo binene. Nahabwakikyo yeetegeka na bamukaabaana baamwe kwemuka kwamwabu.

⁷ Mu kuruga hahwo cali yeicalengi yaasetukiri na bamukaabaana baamwe babiri, baatandika kulibata kwirayo mu nsi gya Yuda.

⁸ Beitu heinyuma Nahume yaaweera bamukaabaana baamwe yati, “Mwemuke, huli muntu agyende kwamwabu hali mmaawe. Nka kumwali na mbabazi hali beiba beenyu na hali gya, nanywe nkubasabira, MUKAMA abagiire mbabazi.

⁹ MUKAMA abahe huli omwej kuswerwa. Abahe businge mu maka geenyu gahyaka.”

Kasi kandi yaabagwa mu salaka yaabaraga, beitu bo baatamwo kizabiro, baalira.

¹⁰ Baamwiririmwo nibamuweera, “Twe tuku-gyenda kwicala nawe mu bantu baamu.”

¹¹ Beitu yaabeiririmwo naabaweera, “Baana bange, mwemuke kwamwenyu. Kikyani kikubaha kugyenda nagya? Bubwo nagya de mukunnihira kubba nimbyalayo baana bandi ba budulu balibba beiba beenyu?

¹² Baana bange, mwemuke hali babyeru beenyu, habwakubba nguluusiri tincakasobora kutunga mudulu akunswera. Kadi nahwo, mbenge nincali na kyenihizo kya kubyala mu bitekerezu byange, rundi, mbenge nindi na mudulu deeru lili, nkabyala baana ba budulu,

¹³ mwakeicala mubalindiriri kudoosya babbeerj basigazi bahandu? Mwakali nimwicala mutasweberwe habwabu? Tikikusoboka, bamukaabaana bange. Gya hujune bundinabwo

bukukira bwenyu bumuli nabwo, habwakubba MUKAMA yooyo ankoori yati.”

14 Bubeegwiri yatyo baatamwo kizabiro kindi. Kasi mwomwo Orupa yaagwa mubyala gyamwe mu salaka yaamuraga, beitu Ruusi yaamwe-homereeri.

15 Nahume yaamuweera, “Wona, mukaamuramwo alimukwemuka hali bantu baamwe na hali baruhanga baamwe. Gyenda nayo.”

16 Ruusi yeiririmwo mubyala gyamwe naamuweera yati, “Leka kumpambiriza kwemuka. Cali okugyenda hoho nkwiza kugyenda, cali okwicala hoho nkwiza kwicala. Bantu baamu baabbanga bantu bange, na Ruhanga waamu yaabbanga Ruhanga wange.

17 Cali oligwa hoho ndigwa, kandi hoho ndiziikwa. Nkurahiriiri, gya nawe lukuu lwolwo luli twahukania, beitu kakubba nkurugaho mu mulingo gwensei, MUKAMA yanfubiranga na kifubiro kinyamaani.”

18 Nahume buyaakakyetegeriize nka Ruusi kuyaalingi amaliriiri kimwei kugyenda nayo, atakabunje kumuweera kintu kya kwemuka kwamwabu.

19 Nahabwakikyo kwokwo yatyo babwo bakali babiri baagyendiri hamwei kudoosya bubaadoori Bbeterehemu. Bubaadoori Bbeterehemu rubuga lwensei lwajagaara habwa babwo bantu babiri. Mwomwo bakali bamwo mu rubuga beebuulya, “Yogwo mukali yaakubba Nahume kwo?”

20 Nahume yaabeiririmwo naakoba, “Muleke kunzeta Nahume,* munzete Maara,† habwakubba Ruhanga Wabusobozi Bwensei andeeteeri hujune mu bwomi bwange.

21 Bunyaarugiri haha nyaagyendiri nindi na muggi na bintu bikumala, beitu MUKAMA anziriirye ntali na kintu. Haloho nsonga gyensei gikubaha kunzeta Nahume? MUKAMA Wabusobozi Bwensei yooyo andeeteeri kuwonawona, kandi yooyo andeeteeri hupu hujune.”

22 Kwokwo yatyo Nahume yeiriri kuruga mu nsi gya Mowaabbu na mukaamwana waamwe, Ruusi, Nyakamowaabbu. Hali baadwereeri Bbeterehemu, busumi bubwu bwali bwa bantu kutandika kukesha nganu.‡

2

Ruusi Naaromba na Bbowaazi

1 Haalingiho mudulu omweji wa mu Bbeterehemu gibeetengi Bbowaazi. Bbowaazi yaalingi mudulu muguuda yeegebeerwe, kandi wa mu luganda lw’Erimereki, iba Nahume.

2 Kiro kimweji, Ruusi, Nyakamowaabbu, yaawereeri Nahume naakoba, “Nzikiriza ngyende mu misiri mya bantu aleke nkomakomereerye nganu gisigaliri mu musiri gwa muntu yensei akwiza kungiriira mbabazi.”

* 1:20 1:20 Ibara Nahume makuru gaalyo nti, *Kusemererwa*.

† 1:20 1:20 Ibara Maara makuru gaalyo nti, *Bujune*. ‡ 1:22 1:22 Kigambu Nganu Bbajbbuli zindi zikoba *Bbale*. Bbale bagikoresya nka nganu kutimba migaati.

Nahume yaamwiririmwo naamuweera, “Mwana wange, gyenda.”

³ Nahabwakikyo Ruusi yaagyendiri mu misiri kwokwo yaatandika kukomakomereerya nsigalira za nganu, inyuma lya bantu banyakubba nibakukesa. Kya mugisa gurungi yeezagiryee naakomakomereerya nsigalira zizo mu musiri gwa Bbowaazi munyakubba nali munyaruganda w’Erimereki, mugeni wa Ruusi.

⁴ Nahaahwo hoho Bbowaazi yeziiri kuruga Bbeterehemu, yaadwa yaaramukya babwo bakesi, “Mbaramukiirye, MUKAMA abbe nanywe!”

Baamwiririmwo nibakoba, “Tukuramukiirye natwe, MUKAMA akuhe mugisa!”

⁵ Kasi mwomwo Bbowaazi yaabuulya muhandu wa bakesi, “Yogwo muhala ali muhara wa naani?”

⁶ Muhandu wa bakesi yaamwiririmwo naakoba, “Yogwo muhala ali Nyakamowaabbu munyakwiza na Nahume kuruga mu nsi gya Mowaabbu.

⁷ Ansabiri naakoba, ‘Beiraba, ndeka nkomakomereeryemwo, nsorooze nsigalira za ha bibbambu bya babwo bakesi.’ Kale nu, kuruga mwakya, eiceeri mu musiri naakora na maani kudoosya hataati, kutoolaahona habwa bwire budooli buhu bwahumwirirho mu katuntulu.”

⁸ Nahabwakikyo Bbowaazi yaagyendiri hali Ruusi yaamuweera, “Muhara wange, weegwa bigambu binkukuweera. Otagyenda kukomakomereerya nganu mu musiri gundi,

otalirugahoona haha. Icala haha na bahala bakori bange

⁹ Oicalenge nookora na bahala bakori, bahondera badulu bakesi. Ndagiiri babwo badulu batakugadagadya. Buwaakakwatwanga nyoota, gyendanga noonywa meezi hali biyo byese bya badulu bateerimwo meezi.”

¹⁰ Nahabwakikyo Ruusi yaakundiri malu hansi yaasiima, kandi yaabuulya Bbowaazi, “Nsonga kyani gikuheeri kubba na mbabazi zijeeni hahwo hali gya munyamahanga?”

¹¹ Bbowaazi yaamwiririmwo naamuweera, “Bintu byensej byobbanga nookoora mubyala gyamu kuruga ibaawu buyaakwiri, babimbwereeri, nka kuwaarugiri kwamwenyu hali bbaawu na maawu weiza kwicala na bantu bawaali otakawonangaho.

¹² Nkusaba MUKAMA akusasule bintu biwaakoleeri Nahume. MUKAMA Ruhanga w’Isaleeri hali oirukiiri akujune, akuhe mugisa otunge binene.”

¹³ Mwomwo Ruusi yaaweera Bbowaazi, “Mukama wange, onzolokeerye mbabazi kwo, habwakubba bigambu bya mbabazi byombwereeri bimpumulirye mutima, nabunyakabba ntali omweji hali bazaana baamu.”

¹⁴ Bwire hwa kudya buhwadoori Bbowaazi yaaweera Ruusi, “Iza haha kudya. Weetonera bidyo, obidiisye lilyo nnyeni lya viino.”

Ruusi buyeicaliri kudya hamweji na bakesi, Bbowaazi yaamuhaho nganu gisyeye. Ruusi

yaadiiri buli kidyo kiyendeerye yeicuta, yaatiga na bindi.

¹⁵ Ruusi buyaakubiriyo mu musiri kukomakomereerya nganu, Bbowaazi yaaragiri babwo bakori baamwe naabaweera, “Ruusi nabuyaakomereeryanga nganu mu gigyonganu gibboheerwe, mutamugaananga.

¹⁶ Na kindi, mulinakutoolanga nganu gindi ha gigyogimubbohiri nimumulekeraho aleke nayo atungeho nganu giyaakomakomereerya, mutamugaananga.”

¹⁷ Nahabwakikyo Ruusi yaakomakomereerye nganu mu musiri gwa Bbowaazi kudwereera kimwejoojolo. Kasi mwomwo yaasukusa gigyonganu yeizuuulya lukimba lwa mpuule lukwijanjana kiloguraamu ikumi.

¹⁸ Yeetwekiri lukimba lwamwe yeemuka mu rubuga, Bbeterehemu. Buyeemukiri, mubyala gyamwe yaadoori yaawona bunene bwa nganu giyaalingi akomakomereerye. Kindi, Ruusi yaaleeteri mubyala gyamwe bidyobiyaabboheeri ha bidyo binyakumulema kudya.

¹⁹ Mubyala gyamwe amubuulya, “Musiri kyani gugwo gwokomakomereeryemwo gigi nganu? Musiri gwa naani gugwo gwoiceeri nookoleeramwo? Mudulu yogwo akugiriiri mbabazi, MUKAMA amuhe mugisa.”

Mwomwo Ruusi yaaweera mubyala gyamwe bintu bikukwatagana na yogwo mudulu cali yaali akoleeri. Yaamuweereeri naakoba, “Yogwo mudulu cali nyaakoleeri deeru, ibara lyamwe Bbowaazi.”

20 Nahume yeiririmwo mukaamwana waamwe, “Nkusaba MUKAMA yogwo eicala wa mbabazi hali boomi na hali bakuu, ahe yogwo mudulu mugisa.” Yaagyendiri mu meiso naaweera Ruusi, “Yogwo mudulu abba mwijwa ibange, kandi muramu wange akusemeera kubba naatulinda.”

21 Mwomwo Ruusi, Nyakamowaabbu, yaabaza naakoba, “Kindi yogwo mudulu yaambwereeri yati, ‘Icalanga na babwo bakori bange kudoosya hubalikamala kukesā nganu gyange gyensei.’ ”

22 Nahume yaaweera mukaamwana naakoba, “Mwana wange, kikwiza kubba kirungi oicalenge heehi na bahala bakori baamwe, habwakubba kakubba ogyenda mu musiri gwa wondi bakusobora kukugadagadiirya yo.”

23 Kuruga na hubwo Ruusi yaabbengi heehi na bahala bakori ba Bbowaazi, buyaakabanga naakomakomereerye nganu mu musiri, kudoosya hubaakakesiri kumala nganu gyensei. Beitu yaagyendiri mu meiso nakwicala na mubyala gamwe.

3

Ruusi Naatungwa Bbowaazi

1 Kiro kimwei, Nahume yaabuuliirye Ruusi naakoba, “Mukaamwana wange, okuteekereza tikikudwa hudwi nkutungire maka galimwo husinge cali okwiza kubba na mudulu akukuwoneera kurungi?”

2 Oicale okyegiri nti, Bbowaazi wa bazaana bokwicalanga nabo, abba muramuweetu. Deeru joojolo lyoli akwiza kubba naakusukusa nganu.

³ Nahabwakikyo, naaba mubiri, weesijige makuta gakubunya kurungi kandi olwale lugoye lwamu lukukirayo burungi. Kasi mwomwo ogyende heisukusuro lya nganu, beitu oteezoolokya hali Bbowaazi kudoosya buyaakamala kudya na kunywa.

⁴ Buyaakalaala, weetegereze kiikaru kyani cali aleeri. Heinyuma ogyende omubukule magulu, olaale hahwo hali yo. Akwiza kubba nakyakukuweera kukora.”

⁵ Ruusi yeiririmwo mubyala gyamwe naakoba, “Nkugyenda kukora kikyoo kiwakambwera.”

⁶ Nahabwakikyo Ruusi yaagyendiri heisukusuro lya nganu yaakora huli kintu kya mubyala gyamwe kiyaamuweereeri.

⁷ Bbowaazi buyaamaari kudya na kunywa, yeezegwa nali kurungi, yaagyenda kulaalaho hulo hahwo ha ntuumo za nganu. Ruusi yaa sobasobiri mpula mpula, yaabukula magulu ga Bbowaazi, yaalaala hahwo hali yo.

⁸ Ijolo mwitumbi, Bbowaazi yeerundukiri kintu, yehindulahindula, yaagiirye mukali aleeri kwansi wa magulu gaamwe!

⁹ Yaabuulya, “Weewe naani?”

Ruusi yeiririmwo naamuweera, “Gyagya Ruusi muzaana waamu. Nkukusaba ombeeke,* habwakubba weewe oli mwijwa ibange akusemeera kundinda.”

¹⁰ Bbowaazi yaamwiririmwo naamuweera, “Muramu wange, MUKAMA akuhe mugisa.

* **3:9 3:9** Mu ngesu za Bejsaleeri mukaamukwere bwaweera mwijweweiba nti, *Nkukusaba ombeeke*, abba naakumuweera amutwale amuswere.

Mbabazi zizi zonzolokeerye zikukira zizo ziwoolokeerye mubyala gyamu. Habwakubba weegombiri kwahi kutungwa basigazi, babbe nibali baguuda rundi banaku.

11 Kale nu hataati muramu wange, leka kutiina. Nkwiza kukukoora kikyoo kyensei kyosabiri nkukoore. Kandi bantu bensei ba mu lulu rubuga bakyegiri nka kwoli mukali wa ngesu zirungi.

12 Nabunyakabba nindi muramwo mu luganda lwetu, beitu haloho munyaruganda akusemeera kukulinda kukira gya.

13 Laala haha ijolo lya deeru, bwire bwa mwakya yogwo muramwo yaabba yendeerye kukulinda, yooyo akwiza kubba naakulinda. Beitu yaakasuula, nkurahiriiri hali MUKAMA, nkwiza kukulinda. Laala haha kudoosya bwire bwa mwakya.”

14 Nahabwakikyo Ruusi yaaleeri hahwo mu magulu ga Bbowaazi kudoosya bwire bubwakeiri, yaabyoka mwakya karei mu katiti aleke hatabbaho muntu yensei akumulengera. Kandi Bbowaazi yaatekereezi mu mutima gwamwe naakoba, “Haateiza kubba muntu yenseenya akukyega nti haloho mukali yaaleeri haha heisukusuro lya nganu.”

15 Kindi Bbowaazi yaamuweereeri naakoba, “Leeta kakwo kasuuka kawebbohiri, okakwate nkuteeremwo nganu.” Ruusi buyategiri kasuuka kamwei, Bbowaazi yaamutereerimwo nganu gikwijanana kiloguraamu makumi

gabiri, yaamutweka. Mwomwo Bbowaazi† yeemuka mu ruḅuga.

16 Ruusi buyeemukiri, mubyala gyamwe yaamubulya, “Muhara wange, bintu byakali teetej?”

Mwomwo Ruusi yaamuweera bintu byensej bya Bbowaazi biyaamukoleeri,

17 yaagyenda mu meiso naakumuweera, “Yampeeri kiloguraamu makumi gasatu ga nganu, yambwera, ‘Oteemuka ngalu zisa hali mubyala gyamu.’ ”

18 Kasi mwomwo Nahume yaaweera mukaamwana, “Muhara wange, lindiira kudoosya bwoliketegereza kintu kibbeerihho. Habwakubba yogwo mudulu akwiza kwahi kuteekana kudoosya yaakamala zizi nsonga deeru.”

4

Bbowaazi Naaswera Ruusi

1 Bwomwo Bbowaazi yaagyendiri yeicaara ha mulyangu gweirembu lya ruḅuga. Heinyuma munyaruganda yogwo wa Bbowaazi giyaali yaatuliri Ruusi, munyakubba nakusemeera kumulinda, buyeiziri, Bbowaazi yaamweta yaamuweera, “Mwira wange, iza oicaare haha.” Mwomwo yogwo munyaruganda yaagyenda yeicaara.

2 Bbowaazi yeetiriho na bahandu bandi ba lulwo ruḅuga yaabaweera, “Icaare haha.” Nabo de, beicaara.

† 3:15 3:15 Bbajbbuli zindi zikoba Ruusi.

3 Kasi mwomwo yaaweera yogwo munyaruganda waamwe naakoba, “Nahume, muramu weetu munyakwira kuruga mu Mowaabbu alimukutunda musiri gunyakubba gwa mwana weetu, Erimereki.

4 Ntekereeze nti ndinakuleeta zizi nsonga mu meiso gaamu aleke waakabba nookugula gugwo musiri, ogugule mu meiso ga baba bahandu ba bantu beetu. Bejtu kandi waakabba otakugucungura, ombwere aleke nkyege. Habwakubba tihaloho muntu yensei akusemeera kugucungura, kutoolahooni weewe, rundi hubwo gyagya nkubba ninkwira mu magulu gaamu.”

Munyaruganda yogwo yeiririmwo naakoba, “Nkwiza kugucungura.”

5 Kindi Bbowaazi yaabaziri naakoba, “Kiro kiwaakagula gugwo musiri hali Nahume, hubwo na Nyakamowaabbu, Ruusi, mukaa muziro Mahalooni akwiza kubba mukaliwo mwa kulinda ibara lya muziro neitungo lyamwe.”

6 Munyaruganda yogwo buyeegwiri yatyo, yaabaziri naakoba, “Kyabba nikili yatyo, hubwo nkubba ntakusobora kugucungura. Habwakubba mukugucungura nkusobora kuleetera bantu bange hujune. Kale, we gucungure, gya tincakasobora kugucungura.”

7 (Mu busumi bwa kadei mu ngesu za Beisaleeri, muntu yaakacunguranga rundi yaakagulanga kintu, haabbengiho kaboneru ka buguli kakwolokya kikyokintu nka kukihingiri mikono. Omweji mu babwo bantu yaakusulengi nkeito gyamwe naagiha wondi. Gigyo gyogyo

gyali nkora ginyakwikirizibwanga mu hutongole mu nsi gy'Isaleeri.)

⁸ Nahabwakikyo yogwo munyaruganda w'Erimeriki yaaweereeri Bbowaazi naakoba, "Okusobora kugwegulira." Kasi mwomwo yaakusula nkeito gyamwe.

⁹ Mwomwo Bbowaazi yaaweera babwo bahandu na bantu bensei banyakubbaho naakoba, "Kiro kiki muli bakeiso bange ba byenseenya binguuri hali Nahume bya muziro Erimeriki, na batabani Kiryoni na Mahalooni.

¹⁰ Kandi na Ruusi Nyakamowaabbu mukaa munyaruganda weetu, Mahalooni, mutwalireenimwo nka mukali wange, aleke ibara lya Mahalooni litasyera kuruga mu mugigwa, rundi mu bitabbu bya rubuga. Kiro kiki muli bakeiso bange."

¹¹ Kasi mwomwo bahandu na bantu bensei banyakubbaho hahwo mwirembu lya rubuga babaza nibakoba, "Kwokwo, tuli bakeiso baamu. Yogwo mukali, MUKAMA amuhe kubba nka Lakeeri na Leeya mu maka gaamu, bakali babiri babwo banyakubimba nnyumba gy'Isaleeri. MUKAMA akuhe kubba wa maani mu nsi gy'Efuraati na Bbeterehemu.

¹² Kuruga mu lula lwa yogwo muhala wa MUKAMA akuheeri, mugigwamu gwabbanga nka gwa Pereezi, mutabani wa Yuda giyaabyeri na Tamali."

Ruusi Naabyala Mwana wa Budulu

13 Kuruga na buḅwo Bbowaazi yaaswera Ruusi nka mukali waamwe. Bbowaazi buyaakatungiri Ruusi, MUKAMA yaamuha mugisa yaatwala nda yaabyala mwana wa budulu.

14 Mwomwo bakali ba mu lulwo rubuga baaweera Nahume nibakoba, “MUKAMA ahaari-izibwe kiro kiki habwa kukuha mwizukulu yogwo alikulinda. MUKAMA amuhe kubba wa maani mu nsi gigi gyensej gy’Isaleeri!

15 Yogwo mwizukulu waamu yooyo alikuha kubba na kunihira kandi alikulinda, habwakubba mukaamwana waamu Ruusi, yogwo akwendya kandi akukira kadi baana ba budulu musanju, amubyeri mwizukulu waamu.”

16 Mwomwo Nahume yaasenga mwana, yaamukiika kandi yeiceeri naamuwoneera.

17 Haaloho bakali bataahi banyakubaza nibakoba, “Nahume atungiri mwizukulu.” Baamuheeri ibara Obbeedi. Yooyo munyakubba bba Yese, Yese bba Daudi.

Bubyalwa hwa Daudi

18 Gugu gwogwo mugwa gwa lula lwa Preezi: Preezi yaabyeri Hezirooni,

19 Hezirooni yaabyala Raamu,

Raamu yaabyala Aminadaabbu,

20 Aminadaabbu yaabyala Nasooni,

Nasooni yaabyala Salumooni,

21 Salumooni yaabyala Bbowaazi,

Bbowaazi yaabyala Obbeedi,

22 Obbeedi yaabyala Yese,

kandi Yese yaabyala Daḁḁi.*

* **4:22 4:22** Daḁḁi yooyo yogwo munyakubba mukama w'Isaleerj.

**Bitabbu bya Ndagaanu Ghyaka na Bitabbu 6
bya Ndagaanu Gĩgũlũũsu (Lugungu)
Gungu: Ndagaanu Gĩhyaka New Testament**

copyright © 2025 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

Genesis, Ruth, Esther, Psalms, Proverbs, Jonah and the NT from the
Lugungu Translation Project.

All rights reserved.

2025-06-28

PDF generated using Haiola and XeLaTeX on 28 Jun 2025 from source
files dated 28 Jun 2025

b2d1b010-ce36-53f8-94bb-ea31f34239cc